



## ՀԵՏԱԶՈՏԱԿԱՆ ԱՇԽԱՏԱՆՔ

ԹԵՄԱ՝ «Ինտեգրված պարապմունքների կազմակերպումը կարողունակահեն կրթական մոտեցման համատեքստում»

ՀԵՂԻՆԱԿ՝  
ՈՒՍՈՒՄՆԱԿԱՆ  
ՀԱՍՏԱՏՈՒԹՅՈՒՆ՝  
ՄԵՆԹՈՐ՝

Մելինե Մարտիրոսյան  
Սյունիքի մարզ,  
ք.Կապանի թիվ 10 ՆՈՒՀ  
Ա.Դալլաթյան

ԵՐԵՎԱՆ-2023

**ԲՈՎԱՆԴԱԿՈՒԹՅՈՒՆ**

**ՆԵՐԱԾՈՒԹՅՈՒՆ..... 3**

**ԳԼՈՒԽ 1. ՆԱԽԱԴԴՊՐՈՑԱԿԱՆ ՏԱՐԻՔԻ ԵՐԵՒԱՆԵՐԻ ԲՆՈՒԹԱԳԻՐԸ ԵՎ ԻՆՏԵԳՐԱԾ ՊԱՐԱՊՄՈՒՆՔՆԵՐԻ ԿԱՐԵՎՈՐՈՒԹՅՈՒՆԸ..... 6**

1.1. Նախադպրոցական տարիքի երեխաների ընդհանուր նկարագիրը, կարողունակություններն ըստ տարիքի ..... 6

1.2. Ինտեգրված պարապմունքների հասկացությունը, կարևորությունը . 11

**ԳԼՈՒԽ 2. ՆԱԽԱԴԴՊՐՈՑԱԿԱՆ ՈՒՍՈՒՄՆԱԿԱՆ ՀԱՍՏԱՏՈՒԹՅՈՒՆՈՒՄ ԿԱՐՈՂՈՒՆԱԿԱՀԵՆ ԿՐԹԱԿԱՆ ՄՈՏԵՑՄԱՆ ՀԱՄԱՏԵՔՍՏՈՒՄ ԻՆՏԵԳՐԱԾ ՊԱՐԱՊՄՈՒՆՔՆԵՐԻ ԿԱԶՄԱԿԵՐՊՄԱՆ ԻՄ ՓՈՐՁԻՑ..... 15**

2.1. Ինտեգրված պարապմունքների կազմակերպման մոտեցումները..... 15

2.2. «Ձմեռային գվարձալիքներ» և «Ձմեմարդ» ինտեգրված պարապմունքները ..... 16

**ԵԶՐԱԿԱՑՈՒԹՅՈՒՆՆԵՐ ԵՎ ԱՌԱՋԱՐԿՈՒԹՅՈՒՆՆԵՐ..... 24**

**ՕԳՏԱԳՈՐԾՎԱԾ ԳՐԱԿԱՆՈՒԹՅԱՆ ՑԱՆԿ..... 25**

## ՆԵՐԱԾՈՒԹՅՈՒՆ

*Հետազոտական թեմայի արդիականության հիմնավորում:* Ժամանակակից հասարակության, գիտության, արտադրության և մարդկային հաղորդակցության մեջ տեղի ունեցող ինտեգրացիոն գործընթացները նոր պահանջներ են դնում նախադպրոցական ուսումնական հաստատությունների վրա: Նախադպրոցական ուսումնական հաստատություններում չափազանց նեղ շրջանակ է ստեղծվում կոնկրետ գիտակարգերի (օրինակ, մայրենիի և մաթեմատիկայի) ուսումնասիրության համար, իսկ վերջին ժամանակների հիմնական գիտական հայտնագործությունները կատարվել են սիներգետիկ<sup>1</sup> գիտակարգերի համատեքստում: Նախադպրոցական ուսումնական հաստատությունում աշխատող անձը, դաստիարակը պետք է պատրաստ լինի իր աշխատանքային գործընթացում ինտեգրել տարբեր առարկաներ և ստեղծել միջառարկայական կապեր: Այս առումով պետք է հետևողական լինել, որ դաստիարակն առաջին հերթին ինքը բավականին սահուն կերպով տիրապետի այն գիտելիքին, որը պատրաստվում է ներդնել աշխատանքային գործընթացում: Մասնավորապես, կարևոր է դաստիարակին պատրաստել այն բանին, որ վերջինս կարողանա իր գիտելիքներն ինտեգրել պարապմունքների շրջանակում: Ինտեգրված պարապմունքների համատեքստում միջառարկայական կապերի կառուցումը պետք է լինի համապարփակ՝ հիմնված ճշգրիտ մեթոդաբանական հիմքի վրա: Մասնավորապես, նախադպրոցական ուսումնական հաստատություններում ինտեգրված պարապմունքները պետք է անցկացվեն ոչ թե էպիզոդիկ, այլ համակարգված կերպով:

Նախադպրոցական ուսումնական հաստատություններում նախապատվությունը տրվում է ինտեգրված պարապմունքների առավել հասանելի ձևին՝ պարզ ինտեգրացիային՝ մայրենի և մաթեմատիկա, մաթեմատիկա և նկարչություն, երբեմն ինտեգրվում են երեք գիտակարգեր՝ մայրենի, մաթեմատիկա, նկարչություն, բայց ոչ ավելին: Միևնույն ժամանակ, նշենք, որ ընդունելով ինտեգրված պարապմունքների անփոխարինելի կարևորությունը, պետք է փաստենք, որ պետական մակարդակով սահմանելով պահանջներ ոչ միայն նախադպրոցական կրթության վերջնարդյունքների, այլ նաև անձնական և միջառարկայական արդյունքների հասնելու վերաբերյալ, անկասկած, մեծանում է դաստիարակի ծանրաբեռնվածությունը: Թեմայի արդիականությունն առաջին հերթին պայմանավորված է այն հանգամանքով, որ մեթոդական առաջարկությունների

<sup>1</sup> Սիներգիա ինչ որ արդյունք ստանալու համար իրար հետ գործակցող երկու կամ ավել իր կամ անձ, որ առանձին անհնար էր գեներացնել: Սիներգիա տերմինը ծագում է հունարեն synergia συνεργία synergos, συνεργός բառից, որ նշանակում է "աշխատել միասին":

անբավարարությունը, ինտեգրված պարապմունքների համատեքստում նախադպրոցական ուսումնական հաստատությունների վերաբերյալ պետական ծրագրերի համակարգման բացակայությունը դաստիարակին կանգնացնում է գործնական իրականացման խնդիրների առաջ: Այս խնդիրները ենթակա են պարտադիր լուծման, քանի որ բազմակողմ միջառարկայական կապերի միջոցով որակապես նոր մակարդակով լուծվում են ոչ միայն սաների զարգացման և դաստիարակման խնդիրները, այլև նրանք պատրաստվում են դպրոցին և ունենում են զարգացած կարողունակություններ՝ բավականին արագ հարմարվելով դպրոցական միջավայրին:

**Հետազոտության նպատակի և խնդիրների սահմանում:** Հետազոտության հիմնական նպատակն է կատարել նախադպրոցական ուսումնական հաստատություններում ինտեգրված պարապմունքների կազմակերպման դիտարկումներ՝ կարողունակահեն կրթական մոտեցման համատեքստում՝ միտում ունենալով զարգացնել երեխայի կարողունակությունները ներգրավված բոլոր գիտակարգերի համատեքստում:

Առաջադրված նպատակին հասնելու համար աշխատանքում դրվել և լուծվել են հետևյալ խնդիրները.

- մեկնաբանել նախադպրոցական տարիքին բնորոշ առանձնահատկությունները, տարիքից բխող կարողունակությունները,
- ուսումնասիրել նախադպրոցական ուսումնական հաստատություններում ինտեգրված պարապմունքների, միջառարկայական կապերի հաստատումը, դրանց դերը,
- դիտարկել ինտեգրված պարապմունքների անցկացման կազմակերպման ընթացքը,
- ներկայացնել նախադպրոցական ուսումնական հաստատությունում իմ փորձը ինտեգրված պարապմունքների կազմակերպման առումով, որում կարևոր են համարել կարողունակահեն մոտեցման ներդրումը, երեխաների կարողունակությունների զարգացումը:

**Հետազոտության օբյեկտի և առարկայի սահմանում:** Ընդհանուր առմամբ հետազոտության օբյեկտը իրադարձությունների դրսևորումն է ինտեգրված պարապմունքների համատեքստում աշխատանքային գործընթացի կազմակերպման ընթացքում, իսկ առարկան՝ ինտեգրված պարապմունքների ապահոված արդյունքները Սյունիքի մարզի ք.Կապանի թիվ 10 նախադպրոցական ուսումնական հաստատություն հաճախող երեխաների համար: Դրան հասնելու համար անցկացրել ենք 2 ինտեգրված պարապմունք՝ «Ձմեռային զվարճալիքներ», որի ժամանակ ինտեգրել ենք մայրենիի և մաթեմատիկայի պարապմունքները՝ նպատակ ունենալով հասնել խոսքի զարգացման, և

«Ձնեմարդ» ապլիկացիա, որի ժամանակ ինտեգրել ենք մաթեմատիկայի, մայրենիի և նկարչության պարապմունքները:

*Հետազոտության կառուցվածքը և ծավալը:* Աշխատանքը բաղկացած է ներածությունից, ընդհանուր մասից, որը բովանդակում է 2 գլուխ, որոնցից յուրաքանչյուրը բովանդակում է երկուական ենթահարց, եզրակացությունից և առաջարկությունների մասից, օգտագործված գրականության ցանկից: Աշխատանքի ծավալը կազմում է 25 համակարգչային էջ (ներառյալ տիտղոսաթերթը, բովանդակությունը և գրականության ցանկը):

# ԳԼՈՒԽ 1. ՆԱԽԱԴՊՐՈՑԱԿԱՆ ՏԱՐԻՔԻ ԵՐԵՒԱՆԵՐԻ ԲՆՈՒԹԱԳԻՐԸ ԵՎ ԻՆՏԵԳՐԱԾ ՊԱՐԱՊՄՈՒՆԲՆԵՐԻ ԿԱՐԵՎՈՐՈՒԹՅՈՒՆԸ

## 1.1. Նախադպրոցական տարիքի երեխաների ընդհանուր նկարագիրը, կարողունակություններն ըստ տարիքի

Նախադպրոցական տարիքը երեխայի ֆիզիկական և հոգեկան զարգացման ինտենսիվ շրջանն է: Այն բնութագրվում է երեխայի զարգացման սոցիալական նոր իրադրության առաջացմամբ: Նախադպրոցական տարիքը մանկության երկրորդ շրջանն է, որը միջանկյալ դիրք է զբաղեցնում վաղ մանկության և կրտսեր դպրոցական տարիքի միջև: Ընդգրկում է անհատական զարգացման 3-ից 6-7 տարեկանը: Նախադպրոցական մանկության ընթացքում ինտենսիվորեն շարունակվում է երեխաների օրգանիզմի զարգացումը: Աստիճանաբար կատարելագործվում է շարժողական ապարատն ու սենսոմոտորային (զգայաշարժողական) ֆունկցիաները: Մեծանում է պայմանական կապերի ձևավորման արագությունը: Այս ամենը բնականաբար ուղեկցվում է հոգեկան բոլոր ֆունկցիաների և ամբողջության մեջ հոգեկան ողջ կառուցվածքի զարգացմամբ: Զգալիորեն ընդարձակվում են միջավայրի հետ շփման, հաղորդակցման փոխհարաբերությունների շրջանակները: Շարունակվում է խոսքային զարգացումը: Ինտենսիվորեն հարստանում է բառապաշարը հասնելով 3000 բառի: Տարիքային զարգացման այս շրջանում ձևավորվում է երեխայի դիտողականությունը:

Ընդարձակվում է աշխարհի մասին պատկերացումների շրջանակները: Կատարելագործվում է պատճառահետևանքային կապերի հասկացումը: Այս ամենը զուգակցվում է երեխայի զգայական զարգացման հետ, օպտիմալ պայմաններ ստեղծում մտածողության զարգացման համար: Նախադպրոցական մանկության վերջին էտապներում երեխան ընդունակ է դառնում պարզագույն տրամաբանական գործառնությունների իրականացմանը: Զարգացող տարածական պատկերացումները թույլ են տալիս երեխային տարբերակել աջ-ձախ (կողմերը), տարբերակում է ամբողջ-մաս, վերև-ներքև, մոտ-հեռու, առջևից-ետևից, բարձր-ցածր, նախորդ-հաջորդ և այլն հարաբերակցությունները<sup>2</sup>:

Նախադպրոցական տարիքը բնութագրվում է երեխայի զարգացման սոցիալական նոր իրադրության առաջացմամբ: Շրջապատող մարդկանց մեջ նախադպրոցականի գրաված տեղը էականորեն տարբերվում է այն տեղից, որը բնորոշ է վաղ մանկական

<sup>2</sup> Обухова Л.Ф. Возрастная психология. – М.: Россия, 2011, 414 с., с. 29., Обухова Л.Ф. Детская возрастная психология: Учебное пособие для вузов. - М.: Педагогическое общество России, 2000.-443 с., с. 57

տարիքի երեխայի համար: Հոգեկան զարգացման արդյունավետությունը մեծապես պայմանավորված է նրանով, թե ինչպիսին է եղել անցումը վաղ մանկությունից նախադպրոցական տարիքին: Հոգեկանի զարգացման գործընթացում հաջորդականության սկզբունքին համապատասխան վաղ մանկության ընթացքում նախապատրաստվում են որոշակի նախադրյալներ, որոնք հիմք են դառնում հաջորդ տարիքային շրջանում լիարժեք հոգեկան զարգացում ապահովելու համար: Երեխան վաղ մանկության շրջանում ձեռք է բերում մի շարք հոգեբանական նորագոյացություններ՝ խոսք, արտաքին աշխարհից եկող գրգռիչներին տարիքին համարժեք արձագանքելու ընդունակություն, սոցիալական միջավայրում որոշակիորեն կողմնորոշվելու կարողություն և այլն<sup>3</sup>:

3-5 տարեկանում երեխան տարրական պարտականություններ է ձեռք բերում: Նոր ձևեր է ստանում մեծերի հետ երեխայի ունեցած կապը: Համատեղ գործունեությունը հերթափոխվում է մեծահասակների ցուցումների ինքնուրույն կատարմամբ: Այս տարիքում առաջին անգամ հնարավոր է դառնում քիչ թե շատ հետևողականորեն և ըստ որոշակի ծրագրի երեխային գիտելիքներ սովորեցնելը: Սակայն, ինչպես ցույց է տվել Լ. Ս. Վիգոտսկին, այդ ծրագիրը կարող է իրագործվել միայն այն չափով, ինչ չափով այն երեխայի համար սեփական ծրագիր է դառնում: Երեխաների էական առանձնահատկություններից մեկը տարեկիցների հետ որոշակի փոխհարաբերությունների հաստատումը և «մանկական հասարակության» ստեղծումն է: Այլ մարդկանց նկատմամբ երեխայի սեփական ներքին դիրքորոշումը բնութագրվում է սեփական «ես»-ի և արարքների գիտակցվածության աճով, մեծերի կյանքի, գործունեության ու փոխհարաբերությունների նկատմամբ ցուցաբերվող հսկայական հետաքրքրությամբ:

Երեխաների գործունեության առաջատար տեսակը դառնում է խաղը: Խաղն առաջատար է դառնում ոչ այն պատճառով, որ ժամանակակից երեխան, որպես կանոն, իր ժամանակի մեծ մասը անց է կացնում խաղալով և համեմատաբար քիչ է ներգրավվում մեծահասակների աշխատանքային գործունեության մեջ: Այն երեխայի հոգեկանում որակական փոփոխություններ է առաջացնում: Խաղի մեջ երեխան զարգանում է որպես անձ, նրա մոտ զարգանում են հոգեբանական այն կողմերը, որոնցից էլ կախված է լինում երեխայի հետագա ուսման և աշխատանքային գործունեության ընդունակությունները, նրա շփումը մարդկանց հետ<sup>4</sup>:

<sup>3</sup> Տարիքային և մանկավարժական հոգեբանություն – Պրոֆ Ա. Վ. Պետրովսկու խմբագրությամբ – Ե. 1977, էջ 59-65:

<sup>4</sup> Андреева, А.Д. Современный дошкольник: возрастные нормы и жизненные реалии / А.Д. Андреева // Психолог в детском саду. – 2010. – № 2., с. 3-17

Հասարակության մեջ իրենց յուրահատուկ տեղը ունենալու հետևանքով երեխաները դերային խաղեր են խաղում, որոնք մեծահասակների կյանքին հաղորդակից լինելու յուրահատուկ ձևեր են: Բովանդակային խաղում դերի կատարման էությունը հենց խաղի մյուս մասնակիցների նկատմամբ այդ դերի կողմից պահանջվող պարտավորությունների կատարումն ու իրավունքների իրականացումն է: Որոշակի դերերի հետևողական կատարումը երեխաներին կարգապահ է դարձնում: Համատեղ գործունեության ընթացքում նրանք սովորում են համաձայնեցնել իրենց գործողությունները: Երեխաների խմբի մյուս անդամների հետ ունեցած այդ իրական փոխհարաբերությունները ոչ միայն կոլեկտիվիստի գծեր են ձևավորում, այլև զարգացնում են երեխայի ինքնագիտակցությունը: Հասակակիցների և նոր ստեղծվող կոլեկտիվի կարծիքը հաշվի առնելը երեխայի մեջ նրբազգացություն է ձևավորում սոցիալական երևույթների նկատմամբ, առաջ է բերում ինքնուրույնություն, խմբային պահանջներին հետևելու ընդունակություն, ապրումակցման կարողություն և այլն: Այս ամենը թույլ է տալիս ասել, որ խաղացող երեխաների խումբը սոցիալական հարաբերությունների յուրահատուկ դպրոց է, որտեղ մշտապես վարքի սոցիալական ձևեր են մոդելավորվում ու ամրապնդվում<sup>5</sup>:

Խաղի ընթացքում երեխան հեշտությամբ հասկանում է, որ իրական առարկան հնարավոր է փոխարինել խաղալիքով կամ որևիցե պատահական իրով: Նա ոչ միայն կարողանում է առարկաները փոխարինել միմյանցով, այլև առարկաները, կենդանիներն ու մարդկանց՝ իր անձով:

Կյանքի այս փուլում խաղը ըստ էության սիմվոլիկ (նշանային) բնույթ է ստանում: Սիմվոլիկ խաղը, ընդհանրապես երեխայի կողմից նշանների օգտագործումը, նրա հոգեկանի զարգացման գործընթացում էական նշանակություն ունի: Նշաններ օգտագործելու գործառնության զարգացման շնորհիվ երեխան ծեռք է բերում ընկալածը դասակարգելու ընդունակություն:

Խաղային գործունեությունը նպաստում է կամաժին ուշադրության և կամաժին հիշողության զարգացմանը: Խաղի ընթացքում ավելի վաղ ու հեշտությամբ է դրսևորվում ուշադրությունը կենտրոնացնելու, մտապահելու և մտաբերելու գիտակցական նպատակը: Երբ երեխան չի ցանկանում ուշադրություն դարձնել այն ամենի վրա, որը կարևոր է խաղային իրադրության մեջ, եթե չի մտապահում խաղի պայմանները, ապա խաղընկերները պարզապես վտարում են նրան: Շփվելու և հուզական խրախուսանքի արժանանալու

<sup>5</sup> Տարիքային և մանկավարժական հոգեբանություն – Պրոֆ Ա. Վ. Պետրովսկու խմբագրությամբ – Ե. 1977, էջ 59-65:



պահանջմունքը երեխաներին ստիպում է նպատակասլաց կերպով կենտրոնացնել ուշադրությունը և մտապահել այն, ինչ անհրաժեշտ է:

Խաղի հետ միասին 3-5 տարեկան երեխաների հոգեկան զարգացման գործընթացում էական դեր է խաղում նաև արդյունարար գործունեությունը, նկարելը, ծեփակերտումը, ապլիկացիան, կառուցողական բնույթի ակտիվությունը: Սրանցից յուրաքանչյուրի համար բնորոշ է այնպիսի որոշակի արդյունքի (նկարի, կառույցի) ստացման միտումը, որը ունի որոշակի նախապես տրված հատկություններ: Երեխայից պահանջվում է ձեռք բերել անհրաժեշտ արդյունքը, նույնիսկ այն դեպքում, եթե բուն գործունեության գործընթացը տվյալ դեպքում նրան չի գրավում: Նա պետք է կարողանա մտահղացում ունենալ և հետևողականորեն իրագործել այն: Բնական է, որ 3 տարեկան երեխաները իրենց գործողությունները դեռևս ի վիճակի չեն ենթարկելու նման պահանջների: Առաջին շրջանում նրանց գրավում է ոչ այնքան արդյունքը, որքան բուն գործունեության գործընթացը՝ խորանարդիկներ շարելը, կավի ձևը փոխելը, մատիտ գործադրելիս թղթի վրա հետքի առաջացումը: Արդյունք ստանալու միտումը ձևավորվում է աստիճանաբար, գործունեությանը տիրապետելու ընթացքում:

Այդպիսի ուղղվածության ձևավորմանը զուգընթաց երեխան յուրացնում է անհրաժեշտ արտաքին և ներքին հոգեկան գործողություններ, նրանում գեղագիտական ապրումներ և ստեղծագործական ընդունակություններ են առաջանում:

Գիտնականները հատկապես մեծ ուշադրություն են դարձնում երեխաների նկարչական ակտիվության վրա: 3-5 տարեկան երեխաների նկարած պատկերները ունեն յուրահատկություններ. Դրանք սխեմատիկ են (մարդը պատկերվում է մի քանի գծերով), դրանցում հաճախ խախտված են լինում ըստ մեծության առարկաների ճիշտ հարաբերությունները (ծաղիկը կարող է տնից մեծ պատկերված լինել), տարածական հարաբերությունները: Երբեմն առարկան պատկերվում է միաժամանակ տարբեր կողմերից: Այդ առանձնահատկությունները որոշ չափով բացատրվում են նրանով, որ այդ նկարները հաճախ միայն խաղի կամ հետաքրքիր իրադարձությունների վերաբերյալ պատմությունների տարրեր են հանդիսանում: Այն, ինչ բացակայում է պատկերի մեջ, լրացվում է խոսքով կամ ժեստերով: Զգացվում է նաև պատկերման այն եղանակների աղքատ լինելը, որոնց տիրապետում է երեխան: Բայց այդ պատկերներում դրսևորվում են նաև երեխայի ընկալման ու մտածողության որոշ բնորոշ գծեր: Այդ է վկայում այն փաստը, որ շատ դեպքերում երեխաները հեշտությամբ են ճանաչում հասակակիցների նկարած առարկաները, մինչդեռ մեծերը դժվարանում են: Արդեն նախադպրոցական տարիքում կարելի է հասնել առարկաների ճիշտ պատկերման, եթե երեխաներին ինչպես հարկն է

սովորեցնում են նկարել. պատկերվող առարկաները ուշադրությամբ ու հետևողականորեն ուսումնասիրելու և նրանցում բնորոշ կողմերը առանձնացնելու կարողություն են ձևավորում, երեխաներին զինում են տեխնիկական անհրաժեշտ հմտություններով: Այդպիսի ուսուցումը նպաստում է ակտիվ նպատակասլաց ընկալման և մտածական օպերացիաների զարգացմանը: Երեխան անհրաժեշտ «գործիքներ» է ձեռք բերում իր մտահղացումները մարմնավորելու համար: Սրա շնորհիվ զարգանում են նրա ստեղծագործական ընդունակությունները:

Պատկերման գործունեության զարգացման ընթացքում գույներից օգտվելու պահանջումն է առաջանում: Սկսում են դրսևորվել գույների օգտագործման երկու տենդենցներ: Առաջինի դեպքում երեխան գույնը օգտագործում է ինքնակամ, այսինքն կարող է առարկան կամ նրա մասերը ներկել յուրաքանչյուր ներկով (մարդու մի ձեռքը՝ կարմիր, մյուսը՝ կանաչ), հաճախ առարկային ոչ համապատասխան գույնով: Երկրորդի դեպքում երեխան ձգտում է պատկերող առարկան ներկել իր իրական գույնով: Սա բացատրվում է նրանով, որ հաճախ երեխաները առարկայի գույնը ներկում են մեծերի ասածով, այլ ոչ թե սեփական ընկալմամբ:

Երեխայի նկարների հատկանշական առանձնահատկությունն այն է, որ նրանցում երեխան արտահայտում է իր վերաբերմունքը պատկերին: Իրենց համար «գեղեցիկը» երեխաները պատկերում են վառ գույներով, իսկ «ոչ գեղեցիկը»՝ մուգ, գորշ գույներով: Գույնի օգտագործումը ներգործում է երեխայի ընկալման զարգացման և գեղագիտական զգացողության զարգացման վրա<sup>6</sup>:

2021թ-ին ՀՀ-ում հաստատվեց «Նախադպրոցական կրթության պետական չափորոշիչը»: որով սահմանվում են երեխայի զարգացման, կրթական ծրագրերի բովանդակության պարտադիր նվազագույնը, երեխաների ուսումնական բեռնվածության առավելագույն ծավալը և երեխաներին ներկայացվող որակական պահանջները: Նախադպրոցական կրթության չափորոշիչի փոփոխությունը պայմանավորված է հանրակրթության պետական նոր չափորոշիչի ընդունմամբ, որտեղ նախադպրոցական կրթությունը դիտարկվում է հանրակրթության նախնական աստիճան և նպատակ ունի ապահովել նախադպրոցական կրթության համակարգից երեխայի սահուն անցումը դեպի հանրակրթություն: Չափորոշիչի հիմքում նախադպրոցական տարիքի երեխաների կարողունակությունների վրա հիմնված մոտեցումն է: Այն ներառում է, մասնավորապես, ուսումնադաստիարակչական հիմնական բնագավառները, կրթական ծրագրի

<sup>6</sup> Келли, К. Маленькие граждане большой страны / К. Келли //Новое литературное обозрение. – 2003. – № 60, с. 17-19.

բաղադրիչները և դրանց սահմանման մանկավարժահոգեբանական սկզբունքները, երեխաների ուսումնական, խաղային բեռնվածության առավելագույն չափը կամ դրանց հարաբերակցությունը, երեխաների զարգացման ընթացքի և առաջադիմության մակարդակի դիտարկման ձևերը<sup>7</sup>:

Չափորոշիչը հանդիսանում է երեխայակենտրոն կրթության հիմքը և երեխաների կարիքներին ու հետաքրքրություններին արձագանքելու, յուրաքանչյուր երեխայի անձը հարգելու, համատեղ ուսումնառության գործընթացը խթանելու հնարավորություն է ընձեռում: Չափորոշչով սահմանված են երեխայի լեզվական և հաղորդակցական, ֆիզիկական կրթության, առողջ ապրելակերպի, ճանաչողական, սոցիալական, քաղաքացիական, թվային, մեդիա, մշակութային, մաթեմատիկական և տեխնիկական և այլ կարողունակությունները:

## **1.2. Ինտեգրված պարապմունքների հասկացությունը, կարևորությունը**

Մանկավարժական գիտության մեջ ինտեգրված պարապմունքների մասին շատ է խոսվում ու ներկայացվում են բազմաթիվ գիտական աշխատություններ: Նախադպրոցական ուսումնական հաստատություններում ինտեգրված պարապմունքների և դրանց շրջանակներում միջառարկայական կապերի ձևավորման խնդիրը բազմիցս բարձրաձայնվել է: Այս ուղղությամբ առաջին քայլը միջառարկայական կապերի հաստատման միջոցով նախադպրոցական տարիքի երեխաների ճանաչողական գործունեության բարելավումն էր՝ երեխաների գիտակցության մեջ բնական աշխարհի միասնական պատկեր ստեղծելու վերջնարդյունքով: Ինտեգրված պարապմունքի գաղափարն առաջին անգամ կիրառել են Ուրալում՝ մակնավարժների մասնագիտական պրակտիկայում<sup>8</sup>: Այն լայն տարածում ստացավ, իսկ վերջին տասնամյակների ընթացքում գնալով ավելի ու ավելի համառ են փնտրվում տարբեր գիտակարգերի ինտեգրման հնարավորություններ, որը դիտվում է որպես միասնություն, տարբեր մասերի, տարրերի միավորում մեկ ամբողջության մեջ կամ կորցրած միասնության վերականգնում: Ցանկացած ինտեգրված մոդելի հիմնական տարբերակիչ բնութագրերն են համակարգվածությունը, բարդությունը, ամբողջականությունը, սինթեզը և ներդաշնակությունը:

<sup>7</sup> Հայաստանի Հանրապետության կառավարության 13 մայիսի 2021 թվականի n 744-ն որոշումը «Նախադպրոցական կրթության պետական կրթական չափորոշիչը հաստատելու մասին», Հասանելիությունը՝ <https://www.arlis.am/documentview.aspx?docid=152575> (վերջին մուտքը՝ 15.12.2023, ժամը՝ 15:42)

<sup>8</sup> Дик Ю. И. Интеграция учебных предметов. / Ю. И. Дик. // Современная педагогика. - 2008. - № 9. - С. 42- 47.

Ինտեգրված պարապմունքները ապահովում են երեխայի մտավոր, սոցիալական, հուզական, ֆիզիկական և գեղագիտական ոլորտների համակողմանի զարգացումը: Ինտեգրված պարապմունքները կարևորում են գործունեության այն ձևերը որոնք պահանջում են ինքնուրույն մտածողություն, նախաձեռնողականություն, համագործակցություն, հնարամտություն, անձնական կարգապահություն, շրջապատում կատարվող փոփոխությունների ճիշտ ընկալում: Ինտեգրված ուսուցումը ենթադրում է տարբեր մեթոդիկաների միջև կապերի ստեղծում, այսինքն, որևէ թեմա ուսումնասիրելիս ամփոփվում են տարբեր մեթոդիկաներից հարցեր և երեխաները հասկանում են տարբեր մեթոդիկաների միջև գոյություն ունեցող կապերը: Երեխաների առաջարկվում են հետաքրքիր թեմաներ կենսական հարցերի շուրջ: Ուսումնասիրվող թեմայի մեջ երեխաների հետաքրքրություններին կենտրոնական տեղ հատկացնելով ապահովվում է երեխաների շահագրգռվածությունն ու հետաքրքրասիրությունը թեմայի նկատմամբ: Խաղի տարրը ինտեգրված դասի անբաժանելի մասն է :

Ինտեգրված դասի հիմնական խնդիրները

- երեխաների կողմից շրջապատող աշխարհի պատկերի ամբողջական ընկալման ձգտումը.
- նախադպրոցականների մոտ տեղեկատվության ինքնուրույն զարգացման և դրա օգտագործման հմտությունների ձևավորում

Դաստիարակը ինտեգրված պարապմունքին նախապատրաստվելիս հաշվի է առնում հետևյալը.

- թեման համապատասխանում է երեխաների հետաքրքրություններին,
- ընտրված թեման նպաստում է երևակայության և ստեղծագործական մտածողության խթանմանը,
- ընտրված թեման անհրաժեշտ է անցնել այնպես, որ ապահովվի բոլոր երեխաների մասնակցությունը,
- երեխաները հնարավորություն ունենան համագործակցելու և որոշակի պատասխասխանատվություն կրելու,
- երեխաները կարողանան ավելացնել իրենց գիտելիքներն ու փորձը՝ միջավայրի, առարկաների, մարդկանց և իրենց շրջապատում տեղի ունեցող իրադարձությունների վերաբերյալ<sup>9</sup>:

<sup>9</sup> Трубайчук, Л. В. Педагогическая стратегия и тактика организации интегрированного процесса в дошкольном образовании / Л. В. Трубайчук, С. В. Проняева. — М. : Книжная палата, 2013. — 173 с., с. 59.

Ինտեգրված պարապմունքների հենքը միջառարկայական կապերի հաստատումն է և գիտակարգերի «հոլիստիկ» ընկալումը: Ինտեգրված պարապմունքները երեխաներին սովորեցնում են բացահայտել, ուսումնասիրել աշխարհը և նրա բազմազան երևույթները և, որ ամենակարևորն է, կապ ստեղծել այդ ամենի միջև: Սա բացատրվում է նրանով, որ երբ նախադպրոցական կրթությունը կազմակերպվում է կապերի միջոցով, փոխկապակցվածությունը հնարավորություն է տալիս վեր հանել պատճառները, ցույց տալ, թե ինչու դա այլ կերպ լինել չի կարող<sup>10</sup>:

Ինտեգրված պարապմունքները կառուցվում են այնպես, որ մի ոլորտի գիտելիքները հիմնվում են մեկ այլ ոլորտից ձեռք բերված գիտելիքների վրա: Այս մոտեցումը ենթադրում է համալիր պլանավորում, գիտելիքների, փաստերի, գաղափարների ու երևույթների սահմանում և իմաստավորում տարբեր բնագավառներից, ինչպես նաև դրանց գնահատում, ինչը խթանիչ է երեխաների ճանաչողական և ստեղծագործական գործունեության համար: Այսպես, երեխայի մոտ զարգանում են ճանաչողական գործունեությունը և քննական մտածողությունը, ձևավորվում է ստեղծագործական միտքը, որի արդյունքում վերջինս կկարողանա տարբեր բնագավառների գիտելիքները համախմբել, ինտեգրել մեկ հարցի շուրջ ու լուծել այն: Այլ կերպ ասած, ինտեգրված պարապմունքը միասնական մոտեցում է ցուցաբերում երևույթների ընկալմանը, գիտակցմանն ու ըմբռմանը:

Ինտեգրված պարապմունքի հիմնական նյութը դառնում է պարապմունքի համակարգային նշանակության բաղադրիչը: Համակարգային կարող է լինել ինտեգրված պարապմունքի միայն այն հատվածը, որը որոշում է դաստիարակի կողմից սահմանված առաջադրանքի նպատակը: Նման բաղադրիչներ են դառնում առանձին հասկացությունները, կանոնները, օրենքները, գաղափարները, մեթոդները կամ ուսումնառության միջոցները:

Կարիք ենք համարում նշել, որ անկախ նախադպրոցական տարիքի երեխաների համար կազմակերպվող ինտեգրված պարապմունքի առանձնահատկությունից, ձևավորվում են միջառարկայական կապեր: Միջառարկայական կապերը ծառայում են որպես դաստիարակության մատչելիության, գիտելիքների որակի բարձրացման անհրաժեշտ պայման: Մենք բոլորս տեսնում և ընկալում ենք առարկաները, երևույթները և շրջապատող աշխարհն առհասարակ յուրովի: Եվ թե քանի տեսանկյունից կկարողանանք ներկայացնել տվյալ երևույթը կամ առարկան կախված է ստեղծագործական մտքից: Իսկ ստեղծագործական միտքը պայմանավորված է միջառարկայական կապերով:

<sup>10</sup> Интеграция образовательных областей в педагогическом процессе ДОУ : пособие для педагогов дошкольных учреждений / Дыбина О. В. [и др.] ; под ред. О. В. Дыбиной. — М. : Мозаика-Синтез, 2012. — 80 с., с. 25.

Միջառարկայական կապերի դերն ու նշանակությունը նախադպրոցականների հետ աշխատանքում հետևյալներն են.

- Նպաստել և խրախուսել երեխաների կրթությունը համակողմանի կերպով, իրենց կյանքի ավելի մեծ փորձի հետ համատեղ:
- Ցույց տալ տարբեր առարկաների մեջ եղած նմանությունները և տարբեր մեթոդներով որոշակիացնել այդ կապերը:
- Ապահովել սովորողների համար ակտիվ և փորձառական դաստիարակության գործընթաց:
- Ջարգացնել բովանդակալից համագործակցություն երեխաների և դաստիարակի միջև:
- Նպաստել երեխաների ճանաչողական, անհատական և սոցիալական զարգացմանը ինտեգրված ձևով:
- Ղաստիարակներին հնարավորություն ընձեռել ներգրավել նորարական մեթոդներ իրենց աշխատանքային գործընթացներում:

Ամփոփելով կարելի է ասել, որ նախադպրոցական կրթության համատեքստում կարևոր տեղ պետք է հատկացնել ինտեգրված պարապմունքներին, որոնք դաստիարակության և երեխաներին դպրոցին նախապատրաստելու հաջողության անհրաժեշտ պայմաններից են: Այժմ, երբ մանկավարժական ժամանակակից տեխնոլոգիաները լայնորեն կյանքի են մտնում, հրամայական պահանջ է դառնում նախադպրոցական կրթության նպատակ համարել բազմակողմանիորեն զարգացած երեխայի կերտումը, ինչը կենսագործվում է ինտեգրված պարապմունքների արդյունքում:

**ԳԼՈՒԽ 2. ՆԱԽԱԴԴՊՐՈՑԱԿԱՆ ՈՒՍՈՒՄՆԱԿԱՆ ՀԱՍՏԱՏՈՒԹՅՈՒՆՈՒՄ  
ԿԱՐՈՂՈՒՆԱԿԱԿԵՆ ԿՐԹԱԿԱՆ ՄՈՏԵՑՄԱՆ ՀԱՄԱՏԵՔՍՏՈՒՄ  
ԻՆՏԵԳՐՎԱԾ ՊԱՐԱՊՄՈՒՆԲՆԵՐԻ ԿԱԶՄԱԿԵՐՊՄԱՆ ԻՄ ՓՈՐՁԻՑ**

**2.1. Ինտեգրված պարապմունքների կազմակերպման մոտեցումները**

Ինտեգրված պարապմունքները ուսուցման կազմակերպման բավականին արդյունավետ ձևերից են, որոնք իրենց մեջ ներառում են երեխաների կողմից կատարվող տարբեր գիտակարգերին վերաբերող տարբեր գործողություններ մեկ թեմայի շրջանակներում:

Ինտեգրված պարապմունքների ընթացքում երեխաները գտնվում են ակտիվ վիճակում և չեն ձանձրանում: Ղաստիարակի կողմից աշխատանքի ձիշտ կազմակերպման դեպքում երեխաները ամբողջ պարապմունքի ընթացքում մեկ գործողությունից անցնում են մեկ այլ գործողության: Պայմանականորեն ինտեգրված պարապմունքը կարելի է բաժանել երեք մասի, որոնցից յուրաքանչյուրը լուծում է երեխաների զարգացման և դաստիարակության հետ կապված տարբեր խնդիրներ և որոնք էլ դաստիարակը հիմք է ընդունում ինտեգրված պարապմունքը կազմակերպելու համար:

Առաջին մասում դաստիարակը հստակեցնում և ընդհանրացնում է երեխաների կարողունակությունները: Ցանկալի է դիմել խաղային հնարների: Երկրորդ մասում երեխաները կարող են կատարել դիտումներ, հետազոտություններ, կամ այլ գործնական աշխատանքներ, որոնց արդյունքում նրանք կհանգեն ուսուցանող թեմայի վերաբերյալ որոշակի եզրակացության: Երրորդ մասում նախընտրելի է, որ երեխաները զբաղվեն կերպարվեստային աշխատանքով, որը կնպաստի նրանց ստեղծագործական կարողունակությունների և երևակայության զարգացմանը:

Ինտեգրված պարապմունքները հնարավորություն են ստեղծում բացահայտելու և զարգացնելու բարոյահոգեբանական հատկություններ՝ պատասխանատվություն, բարյացակամություն, ինքնուրույնություն:

Ինչպե՞ս անել, որ ինտեգրված պարապմունքը երեխաներին ոչ միայն հմտություններով և կարողունակություններով զինի, այլև նաև առաջացնի բուռն հետաքրքրություն ու ձևավորի ստեղծագործական մտածողություն: Ներքոհիշյալ խորհուրդները կարող են օգնել դաստիարակին՝ նախապատրաստելու այդպիսի պարապմունք:

- Որոշել և ձևակերպել պարապմունքի թեման:

- Հստակ ձևակերպել պարապմունքի նպատակային ուղղվածությունը. կոնկրետ ինչի՞ համար է պետք այդ պարապմունքը: Այդ առումով հարկավոր է հստակեցնել պարապմունքի ուսուցանող, դաստիարակող և զարգացնող գործառույթները:

- Մտածել նոր նյութի մատուցման համար հետաքրքրաշարժ մուտք: Այն պետք է առաջացնի երեխայի հետաքրքրությունը, զարմանքը և հիացմունքը:

- Նախապատրաստել դիդակտիկ նյութեր և ստեղծել համապատասխան միջավայր:

- Խմբավորել ընտրված ուսումնական նյութը: Մտածել, թե ինչ հաջորդականությամբ կտարվի աշխատանքն ուսումնական նյութի շուրջ, ինչպես կիրականացվի երեխաների գործողությունների հաջորդականությունը: Խիստ կարևոր է նյութը խմբավորելիս ընտրել պարապմունքի կազմակերպման այնպիսի ձև, որի ընթացքում երեխաները կցուցաբերեն ակտիվ գործունեություն:

- Պատրաստել պարապմունքի սեղմագիրը:

Պարապմունքի պլանավորման քայլերը

1. Ներկայացնել պարապմունքի թեման

2. Նպատակի ձևակերպում /այս բաժնում տրվում է ցանկալի արդյունքի սահմանումը/:

3. Անհրաժեշտ նյութերը

4. Պարապմունքի ընթացքը /ներկայացվում են աշխատանքի ընդունելի տարբերակներ, զանազան մեթոդների կիրառմամբ/

5. Ընկալման մակարդակի ստուգում /կատարվում է լուսաբանում՝ խաղի, գործնական աշխատանքի միջոցով/

6. Ամփոփում և եզրափակում

## **2.2. «Ձմեռային զվարճալիքներ» և «Ձմեմարդ» ինտեգրված պարապմունքները**

Ինտեգրված պարապմունքների իրականացման համար հիմնաքարային ենք համարել վերը բերված մոտեցումները: «Ձմեռային զվարճալիքներ» և «Ձմեմարդ» ինտեգրված պարապմունքների անցկացման համար տարբեր օրերի ստեղծվել են համապատասխան մանկավարժական պայմաններ, իրականացվել է որոշակի մանկավարժական աշխատանք, որը նպաստել է առաջին դեպքում խոսքի զարգացմանը մաթեմատիկական գիտելիքների հետ ինտեգրման համատեքստում, երկրորդ դեպքում մաթեմատիկական գիտելիքների առավել խորը յուրացմանը՝ գեղարվեստական ապլիկացիայի պարապմունքի



միջոցով: Հետագուտական աշխատանքի իրականացման համար կիրառել են զննման, դիտման, զրույցի, ինչպես նաև ինտերակտիվ մեթոդներ՝ մտազրոհ, ենթախմբերի բաժանում, հարցեր հարցադրումներ:

**Պարապմունքի պլանը «Ձմեռային զվարճալիքներ» պարապմունքի համար**  
Անհրաժեշտ նյութեր

- դաստիարակի կողմից նկարչական թղթերից (գունավոր և անգույն) նախապես պատրաստված երկրաչափական պատկերներ՝ շրջան, եռանկյուն, ուղղանկյուն, օվալ,
- սոսինձ, պատկերները փակցնելու համար անհրաժեշտ նկարչական թուղթ:

**Պարապմունքի պլանը «Ձնեմարդ» պարապմունքի համար**  
Անհրաժեշտ նյութեր

- նկարչական թուղթ, փորձաթուղթ, դաստիարակի կողմից նկարչական թղթերից (գունավոր և անգույն) նախապես պատրաստված երկրաչափական պատկերներ՝ շրջան, եռանկյուն,
- բամբակ, սոսինձ, պատկերները փակցնելու համար անհրաժեշտ նկարչական թուղթ:



**Պարապմունքի ընթացքը «Ձմեռային զվարճալիքներ» պարապմունքի համար**  
**Ինտեգրված գիտակարգեր՝ մայրենի և մաթեմատիկա**  
**Խթանման փուլ /3-5ր./**

Երեխաները դաստիարակի օգնությամբ քննարկում են ձմեռային մի գեղեցիկ տեսարան, որտեղ կա ձնեմարդ, տոնածառ, ձյուն է տեղում:

Դաստիարակ- Մտովի պատկերացրե՛ք և ասացե՛ք՝ ի՞նչ տեսարան եք տեսնում:


Ի՞նչ հատկանիշներ ունեն այն ամենն, ինչը դուք մտովի պատկերացնում եք:

Ի՞նչ եք զգում տեսարանը պատկերացնելիս:

**Իմաստի ընկալում**

Դրանից հետո դաստիարակը երեխաներին հրավիրում է սեղանի մոտ, որտեղ նախապես դասավորել է այն երկրաչափական պատկերները, որոնք օգտագործվելու են: Նախ առաջարկում է ասել, թե ինչ երկրաչափական պատկերներ են դրանք, ապա ասել, թե որ պատկերների ստեղծման համար որ երկրաչափական պատկերների օգտագործումն է նպատակահարմար: Ապա առաջարկում է այդ պատկերներով գրատախտակին ամրացված թղթի վրա ստեղծել պատկերացրած տեսարանը: Դաստիարակը ուղղորդում է երեխաներին ամեն պատկերը փակցնելիս տալ դրա նկարագիրը, ասել, թե ինչ զգացողություններ ունի: Այսինքն, դաստիարակն ամեն կերպ միտում է երեխային արտահայտվել և, բացառելով քննադատությունը, դաստիարակը կարող է ընթացքում հմտորեն ուղղել երեխային:

Ստորև ներկայացնում են նկարներ, որոնք արվել են ինտեգրված պարապմունքի ընթացքում:





Կշռադատման փուլում պարզեցի թե ինչ զգացողություններ առաջացան երեխաների մեջ ձմեռային տեսարանը պատկերացնելիս, ստեղծելիս և ինչ նոր բան սովորեցին :

**Պարապմունքի ընթացքը «Ձնեմարդ» պարապմունքի համար  
Ինտեգրված գիտակարգեր՝ մայրենի, մաթեմատիկա, նկարչություն  
Խթանման փուլ /3-5ր./**

Երեխաները դաստիարակի օգնությամբ քննարկում են ձմեռային մի գեղեցիկ տեսարան, որը ստանալու են գեղարվեստական ապլիկացիայի միջոցով:

Դաստիարակ- Մտովի պատկերացրե՛ք, որ դրսում արդեն ձյուն է տեղացել:

Ինչպիսի՞ն է շրջակա աշխարհ, ի՞նչ փոփոխություններ է իր հետ բերել ձյունը:

Ի՞նչ եք զգում տեսարանը պատկերացնելիս:

**Իմաստի ընկալում**

Դաստիարակը առաջարկում է ստանալ ձնեմարդու պատկեր և այն տեղայնացնել ձմեռային տեսարանում: Քանի որ ժամանակային սահմանափակվածությունը և երեխաների կարողունակությունները թույլ չէին տալիս մաթեմատիկական պատկերները ստանալ հենց պարապմունքի ընթացքում, դաստիարակը նախապես պատրաստել էր դրանք: Դաստիարակն առաջարկում է երեխաներին ցանկացած գործողություն կատարելիս խոսել դրանց մասին, ներկայացնել, թե ինչ երկրաչափական պատկերներով են ստանալու ձնեմարդու պատկերը և ձմեռային տեսարանը

Ստորև ներկայացնում են նկարներ, որոնք արվել են ինտեգրված պարապմունքի ընթացքում:





Կշռադատման փուլում պարզեցի թե ինչ զգացողություններ առաջացան երեխաների մեջ ձմեռնարդու պատկերը և ձմեռային տեսարանը պատկերացնելիս, ստեղծելիս և ինչ նոր բան սովորեցին:

Այժմ սահմանենք, թե ինչ կարողունակություններ ձևավորվեցին երեխաների մոտ այս ինտեգրված պարապմունքների արդյունքում.

**1) Լեզվական և հաղորդակցական կարողունակություն`**

Երկու դեպքում էլ, իսկ «Ձմեռային զվարճալիքներ», ինտեգրված պարապմունքի դեպքում առավել ևս երեխաները տիրապետեցին գրական հայերենին, հաղորդակցվեցին տարբեր իրավիճակներում և միջավայրերում, դրսևորեցին խոսքային և ոչ խոսքային ակտիվություն: Ընդունակ եղան ճանաչել բանավոր ներկայացվող երևույթները, ըմբռնել, նկարագրել, մեկնաբանել դրանք, ներկայացնել բացատրություններ: Երեխաներն ունակ

եղան կողմնորոշվել լեզվական միավորներում՝ հնչյուն, բառ, նախադասություն, ունեցան տարրական պատկերացումներ վանկի, հնչյունի և տառի մասին, ինքնուրույն ձևակերպեցին սեփական մտքերը՝ ազատ և կապակցված արտահայտելով կարծիք, վերաբերմունք որևէ երևույթի մասին:

## **2) Ճանաչողական և մոտիվացիոն կարողունակություն՝**

Երկու դեպքում էլ երեխաներն, իրենց տարիքին համապատասխան, ընդունակ եղան պատճառահետևանքային կապեր տեսնել բնության երևույթների, իրադարձությունների միջև, ճանաչել առարկաների և օբյեկտների կապերը, հարաբերությունները, նոր խնդիրներ լուծել: Դրսևորել է ակտիվություն, հետաքրքրասիրություն, ճանաչողական հետաքրքրություն աշխարհի, առարկաների և երևույթների, ինչպես նաև հարաբերությունների կառուցման հանդեպ: Երեխաները հաճույքով (ակտիվ) ներգրավվեցին բնության դրսևորումների նոր բացահայտումների մեջ:

## **3) Ինքնաճանաչողական և սոցիալական կարողունակություն՝**

Երեխաները հաղորդակցվեցին միմյանց հետ, տիրապետեցին փոխհարաբերություններում սահմանված վարքային կանոններին և դրսևորեցին սոցիալապես ընդունված նորմերին համապատասխան վարք: Շփման մեջ երեխաները դրսևորեցին նախաձեռնողականություն և կառուցողականություն, ընկերակցելու, համագործակցելու հմտություններ:

## **4) Ժողովրդավարական և քաղաքացիական կարողունակություն՝**

Երկու դեպքում էլ երեխաները հետևողական էին բարեվարքության կանոններին, միմյանց հետ հաղորդակցվում էին հարգանքով:

## **5) մշակութային կարողունակություն՝**

Երկու դեպքում էլ երեխաները կարողացան գնահատել գեղեցիկը, ճանաչեցին և վերլուծեցին բնության երևույթները, ձմեռային իրականության ինքնատիպությունը: Երեխաները դրսևորեցին ընդգծված հետաքրքրություն գեղարվեստական գործունեության, կերպարվեստային գործունեության տարբեր տեսակների նկատմամբ, արտահայտեցին սեփական հույզերը, զգացմունքներն ու տպավորությունները:

## **6) մաթեմատիկական և տեխնիկական կարողունակություն՝**

Երկու դեպքում էլ ձևավորվեցին մաթեմատիկական կարողունակություններ: Երեխաները կարողացան կատարել պարզ մաթեմատիկական գործողություններ, համեմատում, հետազոտեցին առարկաները և երևույթները, կարողացան որոշել առարկաների քանակը, համեմատել դրանք ըստ մեծության, չափի, ծևի և գույնի, տարբերակել մասը և ամբողջը, երկրաչափական պատկերներն ըստ հատկանիշների:

**7) տնտեսական կարողունակություն`**

Երկու ինտեգրված պարապմունքների արդյունքում էլ երեխաները սկսեցին հասկանալ շրջապատող աշխարհի և բնության երևույթների միասնականությունն ու փոխկապակցվածությունը: Ճանաչեցին բնության երևույթները, եղանակները:

**8) ֆիզիկական կուլտուրայի կարողունակություն`**

Երեխաները պատկերացում կազմեցին ձմեռային մարզաձևերի և դրանց` մարդու մարմնի համար ունեցած առողջարար նշանակության վերաբերյալ:

Ընդհանուր առմամբ բոլորի մոտ ձևավորվեցին հետևյալ կարողունակությունները` ինքնուրույնություն, կարգապահություն, կամք, պատասխանատվություն, համագործակցություն, վճռականություն, փոխօգնություն, ընկերասիրություն, նախաձեռնողականություն:

## ԵԶՐԱԿԱՑՈՒԹՅՈՒՆՆԵՐ ԵՎ ԱՌԱՋԱՐԿՈՒԹՅՈՒՆՆԵՐ

Ամփոփելով մեր կողմից կատարված տեսամեթոդական ուսումնասիրությունները և գործնական աշխատանքի արդյունքները՝ նշենք, որ՝

- Նախադպրոցականների զարգացմանը միտված ինտեգրված պարապմունքները պետք է կառուցված լինեն այնպես, որ երեխան դաստիարակի նվազագույն միջամտությամբ ձեռք բերի անհրաժեշտ կարողունակություններ և հմտություններ: Հարկավոր է ստեղծել այնպիսի մթնոլորտ, որ երեխան ոչ թե պարտադրաբար կրկնի որոշակի գործողություններ, այլ գիտակցաբար անի դրանք: Օրինակ, երբ անցկացնում ենք խոսքի զարգացման ինտեգրված պարապմունքներ, չպետք է ստիպենք երեխաներին կրկնել ասվածը կամ լսածը, այլ պետք է հասնենք նրան, որ երեխան մտածելով յուրովի արտաբերի իր նոր միտքը կամ նոր սովորած ոտանավորը:
- Ինտեգրված պարապմունքների ընթացքում հնարավոր բոլոր ձևերով պետք է խթանել երեխայի մտածողության ձևավորումը: Այդ առումով խիստ կարևոր է դաստիարակի դերը. առաջին հերթին նա պարտավոր է սատար լինել երեխաների սոցիալական գիտակցության ակտիվացմանը և նրբանկատորեն կարգավորել փոխօգնության, շրջապատի նկատմամբ ուշադիր լինելու կարողունակության ձևավորմանը խոչընդոտող խնդիրները:
- Դաստիարակության այս ոլորտում անպայման որպես չափանիշ պետք է վերցնել ոչ թե ցուցադրականորեն ընդգծված, շքեղ դիզայնով ու հագուկապով հանդեսները, այլ մանկապարտեզի առօրյա ինտեգրված պարապմունքները, որոնք ամբողջանում են մտածողությունն ու հմտությունները խթանող վարժություններով և խաղերով: Այս հարցում դաստիարակն ինքը պետք է լինի նախաձեռնող:
- Առաջարկում ենք մշակել մեթոդական ուղեցույցներ և, ինչու ոչ, նաև օրենսդրական կարգավորումներ նախադպրոցական ուսումնական հաստատություններում ինտեգրված պարապմունքների կազմակերպման առումով: Քանի որ այս համատեքստում բարձրանում է դաստիարակի ծանրաբեռնվածությունը, առաջարկում ենք հատուկ այդ պարապմունքների կազմակերպման համար առանձնացնել օգնականի հաստիք:



## ՕԳՏԱԳՈՐԾՎԱԾ ԳՐԱԿԱՆՈՒԹՅԱՆ ՑԱՆԿ

1. Հայաստանի Հանրապետության կառավարության 13 մայիսի 2021 թվականի n 744-Ն որոշումը «Նախադպրոցական կրթության պետական կրթական չափորոշիչը հաստատելու մասին», Հասանելիությունը՝ <https://www.arlis.am/documentview.aspx?docid=152575> (Վերջին մուտքը՝ 15.12.2023, ժամը՝ 15:42)
2. Տարիքային և մանկավարժական հոգեբանություն – Պրոֆ Ա. Վ. Պետրովսկու խմբագրությամբ – Ե. 1977.
3. Андреева, А.Д. Современный дошкольник: возрастные нормы и жизненные реалии / А.Д. Андреева // Психолог в детском саду. – 2010. – № 2., с. 3-17
4. Дик Ю. И. Интеграция учебных предметов. / Ю. И. Дик. // Современная педагогика. - 2008. - № 9. - С. 42- 47.
5. Интеграция образовательных областей в педагогическом процессе ДООУ : пособие для педагогов дошкольных учреждений / Дыбина О. В. [и др.] ; под ред. О. В. Дыбиной. — М. : Мозаика-Синтез, 2012. — 80 с., с. 25.
6. Келли, К. Маленькие граждане большой страны / К. Келли //Новое литературное обозрение. – 2003. – № 60, с. 17-19.
7. Трубайчук, Л. В. Педагогическая стратегия и тактика организации интегрированного процесса в дошкольном образовании / Л. В. Трубайчук, С. В. Проняева. — М. : Книжная палата, 2013. — 173 с., с. 59.
8. Обухова Л.Ф. Возрастная психология. – М.: Россия, 2011, 414 с.
9. Обухова Л.Ф. Детская возрастная психология: Учебное пособие для вузов. - М.: Педагогическое общество России, 2000.-443 с.